



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 6 Yangia anidakangma : Tir Yimym tiryimym@aolima tir yimym TAPAK 8

MNF-i Mizoram nung sorkar kumtetsü: Zoramthanga

WTA Finals: Swiatek-i final asaya nung Pegula kokogo



VOL. XXI NO. 31 (ADOK 31) DIMAPUR RASEMNÜ (WEDNESDAY) YIMPOKSÜI (NOVEMBER) 08, 2023 ₹ 5.00

ACVOA-i ayongzükba Chakka Bandh lapokogo

Mokokchung, November/ Yimpoksüi 07 (TYO): Mokokchung, Zünheboto, Tuensang, Longleng, Phek aser Peren ta district 6 nung All Commercial Vehicle Owners Association (ACVOA) teloki Chakka Bandh November 3 nü nungi ayongzükba akaba November 8 nü nungi lapoktsüogo.

Iba Chakka Bandh ya district 6 nung All Commercial Vehicle Owners Association (ACVOA) teloki taküm Nagaland Legislative Assembly election nung official duty atema gari amshiba sen magütsü aliba asoshi mepelaba sayua Chakka Bandh ayongzükba liasü aser sorkari ACVOA akhangba mataloktsü tashi iba bandh ya manentsü ta sür aliba mapang sorkar ajanga district 6 prongla nung sen agütsütsü tejangja osang ACVOA nem

agütsüba ajanga iba Chakka Bandh ya lapokogo.

Tir Yimym-i iba Chakka Bandh lapokba indang metetnüa All Nagaland Taxi Association Mokokchung (ANTAM) tir Wb. Tongpangba den jembidang, sorkari ACVOA takhangba angateta sorkar teinyaktsü tim inyakba asoshi sorkar dang pelaba metetdaksü.

ANTAM tir-isa Chakka Bandh ayongba mapang nung nüburtemi timtem aika ajuruogo, saka item ajakji aremzüka atasaba ajanga iba Chakka Bandh takok nung tembangogo ta nübur ajak dang tepelaba metetdaksü. Iba den külemi lokti tentet balalai iba Chakka Bandh akaba nungita sorkar den tezüluba balala ajanga jembiba asoshia tenüng metetshiaka lokti ajak dang tepelaba metetdaksü shisem.

14th NLA Emergency Session atema Car Passes agütsütsü

Dimapur, Yimpoksüi/Nov. 07 (TYO): 14th Nagaland Legislative Assembly indang Third Session (Emergency Session) November 9, 2023 nü amentsü aliba dak sendakba nung Nagaland Legislative Assembly indang Secretary in-charge, Khruohitunuo Rio-i sangdong ka nung Car Passes aser Official Gallery Passes agütsütsü indang metetdaksü.

Item Car Passes aser Official Gallery Passes alimba maparen ya November 8, 2023 nü office mapang - anepdang 10:30 ako nungi nikongdang 3:30 ako tsüingta tsüinglanglen shia aliba ama agütsütsü:

Ministers, Advisors aser Additional Heads of Departments (AHODs) ajak

dang pei Car Passes aser Gallery Passes ya Special Secretary (Home), Civil Secretariat, Nagaland, Kohima nungi meshitsü metetdaksü.

Members of Legislative Assembly (MLAs) ajunga aser Members indang Personal Secretaries/Personal Assistants tem dang pei Car Passes ya Nagaland Legislative Assembly Secretariat nung aliba Reception Counter Gate No-II nungi meshitsü metetdaksü.

Heads of Departments (HODs), Information and Public Relations (IPR) personnel, aser osangbener temi pei indang Car Passes ya Nagaland Legislative Assembly Secretariat indang Gate No-I nung aliba Reception Counter nungi meshitsü, ta ashi.

NER nung arem chidokba, shikariba, tzü-mopung menenba tebilemetsü lir: Advisor Tongpang

Kohima, Yimpoksüi/Nov. 07 (TYO): Arem chidokba, shikariba, tzü-mopung menenba, tzü-mopung melenba aser iba ama nisunger inyakyim balala ajanga North Eastern Region (NER) indang ecosystem nung timtem ajurur, ta Advisor, Water Resources, Govt. of Nagaland, Tongpang Ozukum-i ashi.

Capital Convention Centre, Kohima nung ananü 'North East India Youth Leaders Conclave' sentong tenzüka nung tongti tesemdang ka ama jembidang, North East region nung alima tebour tajung, takümliruren (biodiversity) aser sobaliba tajung moaja lir, ta Advisor Tongpang Ozukum-i ashi.

Ajisüaka arem chidokba, shikariba, tzü-mopung menenba, tzü-mopung melenba aser iba ama nisunger inyakyim balala

ajanga ecosystem nung timtem ajurur, ta pai ashi.

"Asen ecosystem nung teimla asenoki meteta lir aser asen jakdang tayongzükba aliba asenoki meteta lir, anungji iba ama lokti adenshiba nung item ken o nung jembishinü akatsüla aser region indang biodiversity wazüka ayutsü asoshi mera yanglutsüla," ta pai ashi.

NER nung takümliruren peria moatsüba dang masü saka sobaliba balala lir, aser region indang takümliruren ajanga asenok melemsadaksütsüla saka asen ajangzüktsü asoshi amshitsüla, ta ashi.

Asenoki 'eco-friendly infrastructure' yanglutsüla, aser region nung sempet tulu lapoktsüsa nüburtem dak amendaker tourism asoshi inyaktsüla, ta pai ashi.

Naga flag aser constitution alema aotsüla: Advisor Imkong L Imchen

Kohima, Yimpoksüi/Nov. 07 (TYO): Naga yimten ken o tekeratiba nung tatem kati arutsü asoshi Naga flag aser constitution alema aotsü lenmang lapoka ayutsüla, ta Advisor, Information & Public Relations and Soil & Water Conservation, Imkong L. Imchen-i tanü ashi.

Pai Mokokchung nung October 23 nü jembiba dak sendakba nung NSCN-IM ajanga sangdong ka agütsüba langzia osangbener den jembidang, tanü tashi Government of India (GoI)-i NSCN-IM den

Framework Agreement (FA) zülutepeba anema oa mali, ta ashi.

Ajisüaka NSCN-IM ya iba FA nung shilem ka aser kibur asünung, iba ken o jembiba anema par tebilemba lemsatepeba aser jembishinü meshidak aser aji melenshitsüla, ta pai ashi.

NSCN-IM-i iba ken o angatettepeba menutsü tasa/yimya amshir ta nai ashir asü, ta asüngdang dang, "Tejangjabo memetet/meshitet saka yamaji mesüker," ta pai langzü.

NECN-IM ajanga flag aser constitution temeja akhangba Centre-i agütsütsü memolungba

dak sendakba nung, ken o jembishinüba nung terenlok makai anendaka lira danga lenmang bushitsü merangtsüla, ta pai ashi.

Sorkari agenda danga indang ashidang telangzüba shidak aser tajung agizüktsü renema alitsüla, saka tensa agizüktsütsüsa lenmang bushitsü melena parnok (NSCN-IM) ya tali ang tokteper amai lir, ta Advisor Imkong L Imchen-i ashi.

Parnoki iba ken o jembishinüba yimya nung Naga nunger mepelar, ta ashi.

(Maneni tapak 8 nung...)

Azü shi achitsü mesüra machitsü ya pei molung: RPP

Dimapur, Yimpoksüi/Nov. 07 (TYO): Home Minister Amit Shah-i India nung nashi shi ayokba nokdangtsü asoshi pa tangatetba benokdang kin aikati anema nokdak aser magizük.

Naga nungeri azüshi achiba ya sobaliba nung shilem ka aser iba atema aka bilemetsü mali, ta anthropologist aser Naga Hills of Assam nung British Raj Administrator, J.H. Hutton-i zülua lir. Naga nunger timbai azü shi achir aser asen state nem "The land of dog meat eaters" ta tenüng jalokja lir, anungji kecha masü, ta Rising People's Party (RPP) ajanga November 6, 2023 sangdong ka nung ashi.

Tanü pei sasa tentetba lokti tentet, talisa Maneka Gandhi-i

aniba People for Animals ajanga Naga nunger madak par tangatetba mapa kuma amshitsü meranger. Nashi shi nokdangtsüba atema süang mesüra azü shi nokdangtsüba atema süang, item ya India nunger yimtenren aser sobaliba tsütsü 'ideological battle' nung shilem ka ta The People for Animals, Nagaland Chapter-i angatetsüla aser parnok item sülen manishitsüla mesüra parnok nem manishidaksütsüla, ta RPP sangdong ajanga ashi.

Tanü kanga kera/mela mesüzükdaksüba Naga nunger temi anir People for Animals, Nagaland Chapter yagi Delhi nung par kibur tebilemba

mangateti state nung azü shi nokdangtsü kanga janrar, ta ashi.

Iba ken o ya tila masü ta Naga nunger temi angatetsüla. Ibai "One nation, One Culture" agenda nung shilem ka lir aser Bharat telungzük nung kin tilatem aser sobaliba ajunga 'Sanskritize' asütsü nukjidong lir, ta RPP ajanga ashi.

Court dangi aotsü melena People for Animals, Nagaland Chapter yagi Indian Parliament nung legislation agizüktsü asoshi Maneka Gandhi mesüzüktsüla. RPP ya junga yimsü asütsüba nung rangloker lir, saka "Identity Politics" ya senzüka yutsüra lendong tulu lir, ta sangdong ajanga ashi.

43 Tapi Assembly Constituency bye-election tiptema agiogo

Dimapur, Yimpoksüi/Nov. 07 (TYO): Election Commission of India ajanga sangdongba ama 43 Tapi Assembly Constituency atema bye-election November 7, 2023 nü agia liasü, ta Chief

Electoral Officer, Nagaland, Vyasan R, IAS ajanga sangdong ka nung ashi.

Polling nung lendong timtem atalokba meliasü aser tesunep nung agi. 43 Tapi AC nungi

electors temi polling station 23 prong nung pei franchise amshia liasü. Nikongdang 4:00 ako nung polling shibangba mapang voter turnout ration ya shilem 96.25 liasü, ta sangdong ajangasa ashi.

adokdaksütsü mechi Chief Minister's Micro Financing Scheme tenzü, ta ashi.

Tang aliba danga central schemes tem den külemi CMMFS aser danga scheme balala amshia state aser region nung rongsenketzüng melenshidaksütsüla, ta pai ashi.

Iba mungdang nungi tajangzük adoktsü teimla nung Advisor-i NER nung sempet/teimla lir aser mekongshi aliba rongsen aser nüburtem aser region indang sempet amshitsüla, ta pai ashi.

"Empowering Youth Leaders: Bridging SDGs and inclusive socio-economic development" omen nung ajemdaker ayongzükba mungdang nungya Sikkim densema North Eastern states ti nungi teshimet nübu 100 adener.

Iba sentong ya National Foundation for India (NFI) ajanga Department of Youth Resources and Sports (YRS), Government of Nagaland den lungjemer ayongzük aser European Union ajanga iba sentong asoshi senotsü teyari agütsür aser NEIMUN ya shisatsü aser technical partner lir.

Executive Director of NFI, Biraj Patnaik ajanga sentong tenzüka jemi aser Development Consultant, Local Public Sector Alliance, Washington DC, Limabenla Jamir ajanga tarur pela agizükba o jembia liasü.

Kasa sentong nung Director, Youth Resources & Sports, Nagaland, Kethosituo Sekhose-i 'Fostering Inclusive Development in North East India - Role of Young Leaders' onük jembia liasü.

Chümoukedima nung Ao Folk Fusion ken toktepba sentong agi



Dimapur, Yimpoksüi/Nov. 07 (TYO): Chümoukedima Ao Lanur Telongjem (CALT), Chümoukedima Ao Students' Union (CASU) aser Chümoukedima Ao Baptist Arogo (CABA) Youth Ministry ajanga sobaliba sentong ka November 5, 2023 nü CABA nung ayongzüka liasü.

Iba sentong ayongzüka nükjidong indang Dr Moa Walling-i jembidang, sobaliba aser yimsü-yimpong ya asen otsüla-oboula nung mapang amshiba yimya ka ama masü saka asen ayak ama amshitsü pai ashi.

Iba sentong nung tongti o jembir Imlisunep Jamir (Secretary, CABA) ajanga 'Oshi Oben: Senso Ka Nükmen' onük nung

ajemdaker jembia liasü. Lanurtemi English, Hindi ama bendanger oshi ang sapua jembia tetsü oshi senzüka yutsüba mechi kin ka ama asen ayak samatsü tsübor, ta pai ashi.

Anungji asen Aor ayak wazüka ayutsü mechi sobaliba tsütsü asendenshi nüngdaker, ta pai ashi.

Iba sentong nung CABA kübok fellowships/wards balala tsüngta Ao Gospel Folk Fusion Singing Competition liasü aser yangji Police Baptist Church, Chümoukedima nungia Aor lanurtemia toktepa liasü.

Iba sentong nung ken züluba, mejemba aser atenba nung toktepa liasü. Iba tetoktepba nung Seieuruzha Khouva Fellowship ajanga mezüngbuba jenjang ngutet, Camp Area

Fellowship aser Church Road Fellowship ajanga tanabuba aser tasembuba jenjang nguteta liasü.

Maneni Yanger Imsong aser Sentilong nati Best Composers sempet angu, Chubatsür Jamir-i Best Songwriter sempet angu aser Camp Area Fellowship ajanga Best Attire sempet ngua liasü.

Iba tetoktepba nung tetendangertem ya Wapangla Walling, Sunep Lemtur aser Imtisenla Imsong liasü.

Sentong ya Yanger Imsong aser Imlisenla Imsong nati anir agi aser Tiachuba, Executive member, CALT ajanga melepzüng o jembia liasü.

Iba sentong ya Dr. Moa Walling aser par kibongi sponsor asü.

Wokha nung Lotha Hoho küm 100 ajungba benjong amung

Dimapur, Yimpoksüi/Nov. 07 (TYO): Lotha Hoho küm 100 ajungba benjongmung Wokha nung November 6, 2023 nü "Chanting for Deliverance of Century's Blessing" omen nung ajemdaker munga liasü. Iba sentong moaja Deputy Chief Minister, Nagaland. Yanthungo Patton den ano tejangja nübu aika dena liasü.

Y. Patton-i iba sentong nung jembidang jubilee salem aben aser Lotha Hoho tenzüker aser tang teinyakdak puri anibelem mesasai Lotha nung ajungtsü asoshi inyakba atema tenüngsang agüja liasü.

Lotha Hoho ya teimla milentong, sobaliba asodak aser Lotha nung ola lir ta pai ashi. Küm noklang ka liyonga arudang temelenshi anguba pai pela agizüka liasü.

Lokti tentet balala takok ngua maparen inyaksü asoshi nüburtemi yaritsü kanga tongtipang lir, ta pai ashi aser nüburtem dang iba alizüng ya maongka ama amshia mangatetep bentettsü aser adianu tanüla adokdaksütsü ajungshia liasü. Paisa Lotha Tribal Council building ya

heritage site ka ama wazüka ayutsü ashi.

Advisor, Agriculture, Mhathung Yanthan-i küm 100 ajungba tepela lemsatöp aser Lotha nung tebo-teti nungeri mangdang tajung ayuba ajanga iba jubilee mungteter ta ashi. Naga nung asoshi Lotha nungeri shilem tajung agitsü nüngdaker, ta pai ashi aser hoho den yariteptsü aser amaliteptsü ajungshia liasü.

MLA Y. Mhonbemo Humtsoe-i temeim, temoatsü aser Lotha nung tsüngta telungjem alitsü ayongzüker aser ibaji ajanga yimchiyimjung alitsü ta ashi.

Kasa sentong nung MLA Achumbemo Kikon-i Naga nung asoshi Wokha district kota tongtipang ta asüba indang onük nung jembia aser tejaklen repranga mangdang yur inyaksü ayongzüker.

Dr. Chumben Murry, Advisor to Chief Minister ajanga jembidang Lotha Tribal Council tenzüka mapang Lotha nung lenirtemi tayongzüka balala ajangshiba indang bilemteta jembia aser küm 100 nung temelenshi balala bener arubqa

indang jembia.

Lotha Hoho mendenpuba, Er. Mhondamo Ovung-i tarur pela agizüka o jembidang Lotha Hoho küm 100 ajungba benjongmung nung shilem agirtem dang pelaba lemsatöpa liasü.

Lotha Officers Association indang tatong tir Khyopenthung Tsopoe-i Lotha nung ainba aser terenlok nung tetsükdaksü kecha magütsütsü ayongzüker.

Iba sentong nung WTBC choir ajanga temeja ken ka aten. Iba sentong ya Dr. N Janbemo Humtsoe lenisüba kübok agi, kong Rev. Sankiluma Kikon, President, LBCA ajanga jubilee mungter moaja sarasadem, Rev. Fr. John Ntonsi, Centre in-charge, St. Peters Catholic Church, Longsa ajanga sentong tenzüka sarasadema liasü.

Chief host ajanga jubilee souvenir sayatsü Rev. Nyanchumo Lotha, Executive Secretary, LBCA ajanga jubilee nüngshilong meshiteta sarasademtsü aser Y. Patton, Deputy Chief Minister, Nagaland ajanga semzükja liasü.

Clark Theological College nung Ao oshi agi tenzüko

Mokokchung, November/ Yimpoksüi 07 (TYO): Clark Theological College (CTC) nung tanü November 7, 2023 nung Ao oshi agi tenzüko.

Ao Riju-i Clark Theological College nung Ao oshi agi tenzüka ya Ao oshi oben renloka aotsü asoshi aser talisa laishirtemi tetsü oshi tali terajemba nung angateta Tsüngrem osang tajung sangdongba nung shilem agitsü asoshi lir ta Ao Riju Mendembuba Rev. Prof. Rongsen Longkumer ajanga metetdaksü.

CTC nung tanü iba Ao oshi

ya BD Final Year Semester 2 pur nungi agia tenzüko.

Clark Theological College nung Ao oshi agirtem ajungshia Ao oshi agirrongnungi shibai tematiba jenjang nung takok ngutetdir Ao oshi renloka odaktsütsü tangatetba nung tentetba foundation "Jemtimenba Mollier Foundation" (JMF) ajanga kümren ka nung tematiba jenjang tongteter nem tetushi sempet agutsütsü ta JMF tenung nung JMF Tezülur Wb. I. Temjen Tzüdir-i iba class agiba mapang metetdakja liasü.

Bloom Bazaar Kohima nung Cyber Security Awareness agütsü



Dimapur, Yimpoksüi/Nov. 07 (TYO): Kohima nung aliba Bloom Bazaar nung November 4, 2023 nü Cyber Security Awareness sentong ka agia liasü.

Iba sentong ya Investment & Development Authority of Nagaland (IDAN) ajanga MMB Cyber School den lungjemer ayongzüker. MMB Cyber School ya nüburtem dang Cyber Safety osang sangdongba non-profit society ka lir.

IDAN ajanga ayongzüka Bloom Bazaar ya hopta 30 sentong, koba Hokulbar aser Honibarnü The Heritage, Old DC Bungalow, Kohima nung September 29, 2023 nü nungi lapoka arutar.

Ibai talisa Nagaland nung Floriculture Industry

ajungkettsü aser naro metsürtem aser entrepreneurs nem sapang agütsütsü nükjidong nung lir, kong pei inyaktetba sayur aser ayoker.

Iba sentong nung Limasenla Moa aser Vizotuo Sothu na Guest Speaker ama liasü aser tenati tanü digital lima nung cyber security indang jembia liasü.

'Scams aser online frauds, cyberbullying, online information sharing, slow system behavior, unexpected pop-ups, unusual error messages' aser anungji battery atemba indang jembia liasü.

Online ajanga osangtsüsang lemsatöpba, lija-liyongba aser ayokba, tim masüba content tem reprangba ama anogoshi amshiba yimyatem indang tenati jembia liasü.

Noklak nung NPSC Prelims atema transportation agütsütsü

Dimapur, Yimpoksüi/Nov. 07 (TYO): Noklak indang Deputy Commissioner, Arikumba, NCS ajanga sangdong ka nung ashiba agi, Tuensang nung November 11, 2023 nü Nagaland Public Service Commission (NPSC) Preliminary Examination agitsü aliba atema 14 Assam Rifles, Noklak ajanga transportation agütsütsü.

Noklak nungi Tuensang-i November 10, 2023 anepdang 10:00 ako nung aotsü, anungji

tejangrartem Noklak nung aliba Public Ground anepdang 9:30 ako nung atongtsüla aser kuli atema Admit Card sayutsüla, ta sangdong ajanga ashi.

Tuensang nung aliba Noklak Sumo Counter nungi Noklak-i November 11, 2023 nikongdang 1:00 ako nung meyipa apusotsü.

Iba transportation services ya nisung 50 asoshi dang lir, anungji mezüng arur nem mezüng maongka agütsütsü, ta sangdong ajanga ashi.



Deputy Commissioner, Tuensang indang Office Chamber nung November 7, 2023 nü Sanitary Napkin Vending Box amenokba mapang tangokba noksa ka nung DC Tuensang, Lithrongla Tongpi Rutsa den DHEW Tuensang indang staff tem angur.



November 07, 2023 nü Chhattisgarh kübok Surajpur district nung Assembly elections dak sendakba lokti senden ka nung Ato kilonser, Narendra Modi agizükdang tangokba noksa nung angur.

November 22 nü India nung G-20 senden ayongzüka agitsü

New Delhi, Yimpoksüi/ November 07 (Agencies): November 22, 2023 nü India-i video conferencing ajanga Group of 20 (G-20) linüktem nungi lenirtem senden ayongzüka agitsü, ta osang ka ajanga metetdaksü.

Taküm küm tetenzüklen India nung G-20 senden aika ayongzüka kaogo aser Delhi nung iba senden tatabangbuba anogo nung India-i kümsük metembangdangsa online ajanga G-20 lenirtem senden ka ayongzüka akatsü, ta metetdakja liasü.

Mongolbarnü Minister of External Affairs, S Jaishankar-

i G20 linüktem nungi ambassador tem senden ka ayongzüka menogo; kasa senden nungji linük kar nungi ketdangsertem den international organisations kar jaoka liasü.

Ketdangsertem den jembidang Jaishankar-i India G20 Tir asüba mapang nung züngsem linüktemi India nungitba atema pelaba lemsatapa liasü.

Tesülen pai X ajanga, tanü Yashobhoomi convention centre, New Delhi nung G20 züngsem linüktem nungi Ambassadors, linük kar nungi tejaokertem aser International

organisations senden menogo, ta metetdakja liasü.

November 22 nü senden atema India-i G20 lenirtem nem tejaokba shidi agütsüogo. Ajisüaka iba senden nung lenirtemi bangzüng kecha merenemtsü.

Iba senden nungji tang Ukraine nung rara, Israel aser Hamas tsüngda rara aser Global South nung climate financing aser clean energy atema jembitsü, ta osang angazüker.

Iba senden nungjisa India-i Global South mesüra tang terenlokdak linüktem nung tayongzüka balala atema süoka jembitsüa akok.

Chhattisgarh assembly election; voters shilem 70.87-i vote agütsü

Raipur, November 07 (Agencies): Mongolbarnü Chhattisgarh nung assembly election mezüngbuba shilem (assembly menden 20 atema) agiogo; nikongdang 5:00 ako tashi nung voters shilem 70.87-i vote agüja liasü.

Constituency 20 nung polling booth 2,900 nungi Bastar region nung aliba polling booth 600 nungbo security sepaitem peria lemezükja liasü.

November 17 nü Chhattisgarh nung election shilem tanabuba agitsü; iba anogo nungji tanüngba menden 70 atema election agitsü.

Ano tanga osang ka nung, Sukma District kübok Minpa nungbo Maoists telungpurtem

den khatepdang CRPF sepaia asem yiruogo. Anepdang kasa district nungsa Maoists telungpurtemi IED bomb ka pokdaktsüba lendong nung Central Reserve Police Force (CRPF) sepaia ka yirua liasü.

Osangbenertem den jembidang SP, Abhishek Pallava-i, "Election kanga tesünep nung agitetogo. Pandariya aser Kawardha nungbo nikongdang 5:00 ako sülen-a 'tokens' alem aser vote agütsüsupurtem tarensena nokdaka liasü. Maoists telungpurtemi timtem agütsüba yimtsüngtem nunga nisung aikati tejangraba nung vote agütsüogo," ta metetdaksü.

Chhattisgarh assembly

election mezüngbuba shilem nung tokteper tongtibang candidates rongnung Chhattisgarh Congress Tir aser MP, Deepak Baij (Chitrakot menden nungi), minister Kawasi Lakhma (Konta menden), minister Mohan Markamr (Kondagaon menden), minister Mohammad Akbar (Kawardha menden) aser minister Chhavindra Karma (Dantewada menden) nunger densema liasü.

Taoba mapang Chief Minister aser BJP candidate, Raman Singh-i Ranjangaon menden atema Chhattisgarh State Mineral Development Corporation Chairman aser Congress candidate Girish Dewangan den toktepa liasü.



November 07, 2023 nü 'November Revolution Day' anogomong nung Kolkata nung Left-wing lenirtem aser pusemertemi Russia nunger Marxist lenir, Vladimir Lenin nem akhüm agütsüsü atema tarensena nokdaka aliba noksa nung angur.

DIMAPUR WATSÜ TELONGJEM

39 Buba Lokti senden

Anogo : Yimpoksüi (Nov) 11/ 2023
 Mapang : 10 ako nungi
 Tesentepdak : Corner Stone College Duncan
 (Near DABA main Church)



Tongti O Jembir : **Wb. K Temjen Jamir.**
 Editor Tir Yimyim.

KEDANGPURTEM

- 1. Tir : Wt. Aoinla Jamir
- 2. Tatong Tir : Wt. Moala Longchar
- 3. Tongti zülur : Wt. Akangrenla
- 4. Repsem zülur : Wt. Wangshikokla
- 5. Senotsü Zülur : Wt. Merenlemla
- 6. Kimen : Wt. N Sashila

SENTONG 1

- 1. Sentong anir : Mendenpurtem
- 2. Telok Ken : Watsü Anthem
- 3. Lai zünga sarasadem : Wt.Moamongla Aier.
Asso.Pastor Women DABA
- 4. Temeja Ken : Changtongyatsür Telongjem Dimapur
Tayonger Mendenpur
- 5. Tayongzükbba : Wb.Meren Nokpu Tir ASTD
- 6. Tetsü Tebo Kensü nung : Longjanglar Telongjem Dimapur
Tayonger Mendenpur
- 7. Onük : "Nü Wadang Koktetang" (30 mts)
- 8. Mezüng Senden tenüngsang : Wt. Yarsangla Taoba Tir



Ki Sübu inoktsür : Chungliyimsentsür Telongjem Dimapur
Timsür (Ushers) : Ao Nokputsür Telongjem Dimapur

SENTONG 2

- 1. Osangtem agitsü : (a) Tongti zülur Osang
(b) Sen bentet Osang
- 2. Osangtem nungi O lemtep Mapang
- 3. Tatem Sarasadem : Telok

METETDAKTSÜR:

- Tebilemba (Agenda) lira senden metenzükdang Mendenpur ket tongjangma.
- Sendeni arur ajak asen Aotsür Aor Sübotsü meraketa sübur arutsü mepishir.
- Senden temer lokti chiyongba mapang alitsü.
- Sentong takok asoshi ajaki sarasadema atadi.

Bihar nung nütsüng shilem 34-i ita nung sen 6,000 den tajemba aazüker

Patna, November 07 Scheduled Castes den (Agencies): Bihar sorkari Scheduled Tribes nütsüng aika agiba caste survey tanabuba senotsü agi kanga timtemer, ta shilem sayaogo, aser iba survey iba survey ajanga bushitet. ji ajanga state nung kanga Kasa survey ajanga, sensak tia nung alir nütsüng aika Backward Class aser Extremely Backward Class nungi nütsüng aliba jangaogo.

Bihar nung nütsüng shilem shilem 33 bo kanga sensak tia nung alir, ta bushitet. 34-ibo ita shia sen 6,000 den nung alir, ta bushitet. tajemba aazüker aser (Maneni tapak 8 nung...)



TIR YIMYIM YIMOBILEM (EDITORIAL)

DIMAPUR

RASEMNÜ

YIMPOKSÜI 08, 2023

ULB nung tetsürtem

Nagaland nung Municipal aser Town Council election tang tashi magitetba timtem ya, kaji municipal aser town council kübok alirtem dang pei li nung alir süaka alimelen agitsüba yimya aser ano kaji, tetsürtem nem menden asem shia ka shiteta yutsütsüba inyakyim anaji asütsü südi. Itemji Naga nunger sobaliba ozüng dak mapeter ta nübertemi nokdakba mapang Nagaland nung tesama aser takoksa tulu ajuruogo. Iba mapang atalokba bilemtettsüsa Kohima nungbo leper dena yanglua lir. Aji oda, Nagaland nunga ozüng yanglur yimsüsürtem dang nungibo nübertem tashi tuluba ta jangjatsüsa tatar senden nung Municipal ozüng latetba ajak amajok kümdaktsüogo. Iba jagi Nagaland nung municipal aser town council aliba tesemtem nung terenlok mapa meinyakteti akoksaba ajangshir, kechiyong center government-i ULB election agia municipal aser town council mekümtetba agi terenlok mapa inyaktsü atema sen meyoker, aser ano külen linük ajunga nung kasa ozüng amshia ULB election agir mapa shitak tenzüka aoer saka Nagaland nungbo mouteter ta asüba agi Supreme court-i Nagaland state government merenshidi asür. Ajisüaka, ano onsara benjaba agi, koba angar koba manga, Nagaland government-i Nagaland Municipal Act mali küma agiener, tang ya Municipal ozüng tasen ka latettsü atema tatar senden ayongzüka lir. Iba maparen nung tajung kaji, state government-i nübertem den meküptepi nübor tsütsü atsünga Municipal ozüng ya latettsü meranger. Ibayongji, tang yangludanga aliba Municipal ozüng nungjibo nübertemi maginüba alimelen saru malitsü aser Municipal aser Town Council nung tetsür mendenbula asütsü ta akhi ozüng nung lateta alibatema malitsü. Ajisüaka, mepaitoktetba kaji Municipal aser Town council nung menden asem shia ka, aji noklang nungbo shilem 33, balaka shiteta yutsütsüba ozüngji asütsü, kechiyong iba arlaji medeniang Municipal ozüng melatettsü, kechiyong ibajibo alitsüla ta Supreme court-ia shia lir. Atangji, Nagaland nunga, akhi tsürabur mapang nung shi agi alanga atsüngba putu menden dak alaka, tanü putu nung tentetba yimten menden legislative assembly-a süang mesüra municipal aser town council-a süang tetsürtemi shilem magitettsüsa tenokdangba kecha maka, anungji election nung tokteptsü koka lir. Iba jagiang tangbo Nagaland Legislative Assembly nung tetsür ana mena lir. Ajisüaka, tetsürtem nem yimten nung menden balaka shiteta yutsütsüsa nungdak akümbaji, tanü sobaliba aser election agiba yimya agi tebur den kasasa toktepa tetsürtem election nung tokteptsüba mapanga kanga tasak kümogo, iba jagi tetsürtem nem yimten nung maongka balaka agütsütsüsa akümer. Atangji, yimten nung tetsürtem nem menden balaka shiteta yutsüba agi tetsürtem jenjang ajungkettsüsa inyaktettsüba tetsürtem dak keta lir. Tanü asen lima election nung teburtem dang toktepaka, election nung sen alemtsü aser proxy vote ajentsü atemabo tetsürtemiang tejangraba inyaker. Item yimya tamajung aser ochimashi mapatemji toktsür, shitakba teburtem den toktepa nübertem asoshi mapa tajung inyaktsü tejangraba nung tetsürtemi yimten nung shilem agira, asen limaji manger sangwa nung junga kümer alitsü. Iba tangatetba aser teimla nung Nagatsürtemi aser talisa Aotsürtemi yimten nung shilem agitsü renemtsüla. Atangji, Nagaland-a state balaka aser labo ano linük temzüng nung arla balaka nung temeten aser maongka talila agüja lir, anungji inyakyim aika nung tanga state-tem den kasa mesütettsü. Ajisüaka, Urban maparen dak aketba Municipal aser Town Council ama yabo akhi sobaliba dak keta maliba ozüng aser inyakyim asünungji, center government-i state ajak nung Municipal ozüng ya kasa asütsüsa ozüng lateta lir. Ano metsütsüi tanü mapangba ya center government-i linük ka ozüng ka, linük ka election ka, linük ka Identity Card ka ta asütsü merangba putu lir. Iba jagi, ashiko, tang Nagaland nung Municipal ozüng tasenbajia, Naga nungertemi agizükyonga, center-ibo magizüksüa akok.

OLEMSABANG

Ao Naga tenem nung Baptist arogo tenzüka

Rev. Temsü Imchen, Asso. Professor,
Discipleship Bible College, Dimapur

Molungkimong aser Molungyimsen arogo ana issue ya kü taküm nung 1971 nungi kübu Rev. Riküm nungi angazüka liasü. Ano 1986 küm pa ABAM Executive Secretary inyakdang ABAM Special Committee kati bener aruba agizükba nia kanga junga meteta liasü. Anungji ni kaket ka "A Critical Study on the Introduction of Christianity among the Ao Nagas" züluogo. 1986 küm ABAMi agizüka aliba nungjagi kechiba ano tanu tashi iba teimtem ya maneni ABAM telemtetba ka anema inyaksangshir ta temulung nung bilema liasü.

Ao Naga tenem nung mezüngbuba Molungkimong yimdak Dr. Clark-i nisung 15 baptia Kibuba Benjong agiba otsü yabo ajaki hau ta agizüktetba aser kechaia aidoktsü makokba tatalokbaji lir.

Iba ocet zülutsü asüadang ni arogo anapronglai züluba kaketem bendena züngogo. Anungji arogo anapronglai timtem aika agia, mapang aser rongsen jenti endoka pei arogo otsü züluba atema tenüngsang agütsür. Iba den American Baptist missionarytem report-tem, aser parnoki Naga church statistics agütsübatema akok tashi bendena aser medemdanga zünger iba ocet ya zülur. Kechiaser tapi agi dang arogo ana otsüji zülura tezülur aser tazüngertem ajak atema khuret ta bilemba agi ajak tabensa ta mesüaka yangi kü tangatetba tongmelang agi lemsateper. Anungji asenoki otsü dang jagi meyipdi.

Molungkimong aser Molungyimsen arogo ana tsüngda mepetmesü khuret ya tongtipang tamendakdak anasü nung lir. Yim tasen akümdang Molungkimong nung tenzüka aliba arogoji belena bener ao asü bener mao? Tanabuba nung Molungyimsen kümer külen Molungkimong nung maneni arogo mesüra Khristantem medangdangi liasü asü masü?

Item indang zülubattem nung ni reprangtetba agi: Molungkimong nung tenzüka aliba arogoji maneni idakji liasü ta kecha zülua mali, mesüra Molungyimsen akümdagi bener ao asütsüa ta jembibabo angashia aruogo. Item atema tejangja kuli mesüra jangja jangjaa (direct evidence) zülubaji mangutsü. Kodang direct evidence-temji melilir tesülen tangari mesüra tezülen nungi züluba (indirect and circumstantial evidence) ji nungdaker. Item kulitemji ajanga asenoki tatalokba otsütemji angatettsü akok.

Item asemprongla atema evidence agütsüadang interpretationji teti asür. Russia nunger mongin Historian E.H. Carr-i züluba kaket "What is History?" nung history-ji tesüiba mapang tanen maka interpretation-tem (continuous interpretations of the past) lir. Taoba/tesüiba mapang kechisa ataloka aser inyaka aru, itemji tanü asenoki interpret asür, ano tarutsü nunga maneni interpret süyonga aotsü. 1872 nungi 1876 tashi Molungkimong nung Dr. Clark, aser yangji aliba Khristantem rongnung kechisa atalok tanü asenoki item nungji ajemdaker Molungkimong aser Molungyimsen arogo anaji 1872 küm Dr. Clark aser Gudhula tenadi tenzüka arogoji koba asütsü ta asüsaa (analysis) bushitsüla.

Molungyimsen arogo otsü asoshi tatalokba kulitem jangja jangjaa aser interpretation-temji sadem sadema dang lir. Tatishitsü agi: Dr. Clark-i Assam Mission Statistics 1876 nung yamai zülua angutsü: Number of baptized member 10 at Haimoung, ano Sixty Third Annual Report 1877 nunga Haimoung nung baptiba member 10 lir ta osang agütsü. Assam Mission Statistics 1878 nung küm June 2, nung parnok 7 baptiba ajanga tangbo baptized member 17 lir ta osang agütsü. Ano Misson to the Nagas nung yamai zülua angutsü, "In the middle of the last rainy season, Gudhula who is the inchargeat Merangkong, baptized there eight persons; and a church was formed. Anungji 1881 küm nungibo Ao Naga tenem nung arogo ana tenzükogo ta iba osang jagi sayur. Ano 1893 Amguri nungi April 3 osang ka yamai Home Board dangi züluba ya ajiang: The Baptist Missionary Magazine for February 1908 p. 313 nung "Can the Heathen Be Saved" nung Mary Mead Clark-i yamai zülua angutsü. "Samar has been for some years pastor of the church at Molung village- the first church organized in all that mountain region."

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Gaza nung kanga rongdak süa kinü tanur 9 baptitsüogo



November 05, 2023 nü St. Porphyrios Greek Orthodox Arogo nung kinü tanurtem baptitsüdag tangokba noksa nung angur.

November 07, 2023: Tang Israel aser Hamas na tsüingda tesashiba raraba mapang Gaza Strip nung aliba Greek Orthodox Arogo kati kanga rongdak süa kinü tanur 9 baptitsüogo.

Amongnü St. Porphyrios Greek Orthodox Arogo nung kinü tanur tekupronglaji külemi baptitsü.

Hopta ka tejaklen iba tesem nung Khristan 19 pokseta asü aser parnok rongnung ano mebaptir kinü tanur asem densema liasü, ibayongji iba rara nung taküm kodanga ang samatsüar memetetba agi tsüraburtemi tanur tekuji baptidaksüogo.

World Council of Churches (CC) den jembidang, St Porphyrios Arogo nung otongdar, Kamel Ayyad-i, rara ajanga tanurtem süadokyonga

parnok Khristan ka ama südaktsüner, ta ashi.

"Iba telemtetba agiba ya temelung shirangtsüka lir, ajisüaka onok atema tanga lenmang mali. Tsüraburtemi pei chirnurtem tarutsü jenjang atema baptitsür saka tang yabo langka tamajung atalok nunga, ta bilema baptitsür. Onok rara tiyongtsü ka nung lir, anungji kechi ang ataloktsüar memetet," ta Kamel-isa metetdaksü.

October 7 nü rara tenzüka sülen tang tashi nung St. Porphyrios Greek Orthodox Arogo nungia züngsem 150 dak tema ki raksaogo aser parnok Tenla kidang jenoka lir.

Kamel Ayyad-isa alima tesem balala nung Arogotem dang Gaza nung aliba Khristantem densema Palestine nung ajak atema sarasademjang, ta mepishi.

Osangbener den jembidang Friends of the Holy Land CEO, Brendan Metcalfe-i, iba rara ajanga Gaza nung Khristantem tamajungba kongshir; Khristantem aika Tenla kitem aser Tenla ki moaputem nung jenoka lir, ta metetdaksü.

Paisa, "Orthodox Tenla kidang yirurtem Catholic Tenla kidangi oa lir; yangji yirua alir nisung 100 shi lir. Teyari balaka nungdaker tanur 100 shi lir aser parnokji Sisters of Charity-i anepalua repringdar. Yangji nisung ajak senteper nisung 1,000 shi lir aser parnoki mozü aser tanga nungdak balala atema anogo shia dollar sen 1,000 shi nungdaker," ta metetdaksü.

Tang Gaza nung aliba Tenla ki aser moaputem nung Friends of the Holy Land-i Khristantem nem teyari agüja arudar.

USCIRF-i Sri Lanka dang yimsü temeden kümzüksü mepishir

November 07, 2023: United States Commission on International Religious Freedom (USCIRF) nung Commissioners- Stephen Schneck aser David Curry nati tawa Sri Lanka nung tesem aika semdangba sülen iba sorkar ketdangsertem dang linük nung minorities temeden kümzüksü mepishiogo, ta International Christian Concern (ICC)-i metetdaksü.

Osangbener den jembidang Commissioner Schneck-i, "Onoki Sri Lanka ketdangsertem, yimsü lenirtem, loktiliba lenirtem, shisashirtem aser osangbenertem ajurua linük nung yimsü dak sendakba onüktem atema o lemteptsü asoshi maongka angu. Sri Lanka nung yimsü balala nungi lenirtemi sabang balala nung o lemteptsü atema renemba asoshi USCIRF-i pelar, ajisüaka Sri Lanka sorkari Khristan, Hindu aser Muslim nung nem

yimsü temeden tuluba agütsüsü atema tang aliba ozüngtem yanglushitsüla aser tashishitsü aliba ozüngtem agentsüla," ta metetdaksü.

Tang Sri Lanka nung nütsüng shilem 7.4 dang Khristantem lir aser Buddhist yimsü amanger nütsüngbo shilem 70 shi lir. Buddhist yimsü amangertemi Khristan yimsü ya bendanger yimsü ama züngshir aser iba yimsü ya Sri Lanka nung maitüsü atema amokmeren lir, ta bilemer.

Yaküm January nungi August ita tashi nung Khristantem amokmerenba, Khristantem anema tesempa o jembiba aser Khristantem anema inyakba tatalokba 53 liasü, ta National Christian Evangelical Alliance of Sri Lanka (NCEASL)-i metetdaksü.

Sorkari Terrorism Act aser International Covenant on Civil & Political Rights Act kübok

Khristantem densema minorities aika apur.

2008 küm sorkari ozüng ka yanglua yimsü balala ajak dang tekülem ki tasen yanglutsü atema register süa temelaba meshitsü metetdakja liasü. Iba ozüng ajanga Khristantemi Tenla ki tasen asütsü atema timtem tulu ajangshir.

"USCIRF-i Sri Lanka sorkar dang registration agiba inyakyimji teladak asütsü mepishiogo. Onokisa Sri Lanka ketdangsertem dang Khristantem densema nütsüng ajema aliba yimsü amangertem temeden kümzüksü mepishir," ta paisa metetdaksü.

USCIRF-i Sri Lanka dang mepishibaji International Christian Concern (ICC)-ia pusemer aser Sri Lanka-i yimsü temeden anema inyakba atema USCIRF-i mepishiba ama Special Watch List nung züngoktsü onokia akhanger, ta ICC-i metetdaksü.

ANOGO ABEN TSÜNGREM DEN

Senti Senmang

T.Ken 147: 12-20

Tejen Lai iba maongka Israel nung nem agüja liasü. Iba indang ken züluri T.Ken 147: 12-20 nung ashir. Pai Yihuda Tsüngremi parnok asoshi inyakba asoshi Pa tenüng asangtsüla ta ashi. "Kechiyong Pai ne süngküm tartangtsü, tashi itdaksü. Pai ne chirtem ne dak moatsü" (t.13). Pai parnok artsü nung yimjung agütsü. Pai parnok mesü. Pai parnok nem Pa O aser ozüng agütsü. Pai parnok nem alinük agütsü. "Kin kecha dang Pai yamaji meinyak: aser Pa O bendangba indang, parnoki itemji metet. Nenoki Kibuba sangang" (t.20). Tsüngremi Israel nung nem Pa senti O agütsü.

Ken züluri Tsüngrem O indang kechi ashir? Tekong 15 nung Tsüngrem ta ashir: "Alima madak Pa temelaba yoker; Pa O kanga karaa aor" (t.15). Kodang Tsüngremi jembir Pai jembiba O Pa nükjidong atalokdaksütsü asoshi tekara osang abener ka ama aor. Tsüngremi Pa O agi alimaji azüoker. Pai ozüng agütsür aser mapatem ataloker.

Tsüngrem Oi temerang oset yimsaa odaktsür. "Pai ozüng agütsür, aser parnok yimsadaksür" (t.18). Tsüngrem Oi temulungjang temokong aser temerang yimsadaksür. Nai tamakoktsü tia kar ajurur asü? Tsüngrem Oi tartangtsü ajak raksatsütsü aser ne nem kechi lapoktsütsü.

Tatempa, Tsüngrem Oi moatsür. "Pai pei O Yakob ang ... parnoki itemji memetet. Nenoki Kibuba sangang" (t.19,20). Tsüngrem Oji zügang. Ibai rongsen tulu lir, kodang ne taküm nung rizüngdir tejang atanger.

Tsüngrem O kara aor aser nükjidong ataloker. Iba yagi yimsadaksür aser lemang lapoktsür. Aser iba yagi tagizüker ajak moatsür, iba tashi angang aser amangang. Tsüngremi anogo shia Pa O agizükdaksünür. Nai ne taküm nung Pa O rizünger asü?

Sudan nung Tenla ki ana poksatsüogo

Juba, November 07

(Agencies): Taoba hopta Sudan linük nung sepai telok ana tsüingda raraba mapang bomb agi Tenla ki ana poksatsüogo.

November 1, 2023 aonung 9:00 ako meta Omdurman nung Sudanese Armed Forces (SAF)-i Sudan Presbyterian Evangelical Church (SPEC) Tenla ki poksatsü. Iba mapang nungji Tenla kima nisung aika liasü saka shinga meyuru.

Mortar shells asem agi SPEC Tenla ki kongshiba ajanga kilem tamajungba raksa aser telung nung Laishiba aser osangkakettem densema osettsüet aika raksa.

November 3, 2023 nüa Khartoum kübok Al-Shajara area nung Roman Catholic Tenla ki ka poksatsüba lendong nung 'nun' asem yiruogo. Bomb ji SAF asü Rapid Support Forces (RSF) teloki pokdaksüar mejangja.

Taküm April 15 nungi tenzüka linük nung sepai telok ana (Sudanese Armed Forces aser Rapid Support Forces) tsüingda rarar aser tang tashi nung nisung 10,000 dak tema

süogo.

Maneni raraba ajanga nisung million 5.6 jenshiogo.

May 14 nüa mejangjaba nisungtemi Omdurman kübok Masalma area nung aliba Coptic Orthodox Tenla ki amakba sülen Tenla kiji military headquarters ama amshidar.

Khristan melungtet telok Christian Solidarity Worldwide (CSW)-i ashiba agi, RSF sepaitemi hopta ka jungnüa Tenla kidang jenoka alirtem merenshia aruba sülen meindoka liasü.

Apirl aser May ita nungsa Khartoum North (Bahri) nung Coptic Arogo Tenla ki ka amak aser kasa tesem nung Evangelical Arogo Tenla ki ka bomb agi poksaja liasü.

2019 küm Islamic lenir Bashir yimsüsüba atsüingdoka liasü, iba sülen linük nung küm ana yimsü temeden liasü saka 2021 küm October 25 nü ano sepaitemi sorkar tasenbaji atsüingdok.

Nütsüng million 43 aliba Sudan linük nung Khristan nütsüng million 2 shi lir aser ibaji linük nütsüng shilem 4.5 dang lir.

AO OSHI ANGAZÜKDAK: TANÜ ANGAZÜKTSÜBA OJANG



Sazük

(v) teküp asa, agizük (skin peeling)
* Tsümaribo an teküp ajak sazüka endoker.

Sazüsapong

(adv) chinüyongnü (gluttonous)
* Telok nung sazüsapong yimya mesayutsüla.

OLONG PAITEP # 6689

	1			2		3		4	
	5								6
			7						
8		9					10		
		11							
12							13		14
				15					
				17					
	18								

TIPIEN

- 3. Miima agi
- 5. Tejangko
- 7. Aou teküp
- 8. Mako / Melemzük
- 10. Saklok / Aket
- 11. Ali nungzüka aluba
- 12. Talentsü
- 13. Ak ayudak
- 15. Ajunga
- 17. Meyong
- 18. O jembitsü tashi

LANGTSÜNGLEN

- 1. Asoshi
- 2. Tashidak lung
- 3. Bangsemo endok
- 4. Nütsüng züngdangba
- 6. Tsüngpret
- 7. Asüng sür külen
- 8. Hai-haura aka
- 9. Telongtet
- 10. T _____ tiba
- 14. Tali / Onsara
- 15. Bilemdanger

OLONG PAITEP # 6688 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden,
- 3. Kloktsü, 5. Lenti,
- 7. Tajangzük, 11. teronem,
- 12. Sempa, 13. Jahaz.

NAI-A YA METETTER MA



Tokyo yimti nungbo minute 50 dang teküpbokba len jajatsü atema gari tila (car) dang nungibo amerlungtsü nung aobajiang tekaraba atonger. Kechiba ta süra Tokyo yimti nung gari onsara aika lir. Tokyo yimti yimdong nung gari mesemi nungtepba yangi noksa nung angur.

MNF-i Mizoram nung sorkar kümtettsü: Zoramthanga



Aizawl, Yimpoksüi/ November 7 (Agencies): Mizoram chief minister Zoramthanga, shiba Mizo National Front (MNF) tir lir pai, par party-i maneni state nung sorkar kümtettsü ta temulung lema bilemba lemsatepogo. "Tanü vote agütsüba anogo ken o tem asadangba sülen MNF-i maneni Mizoram nung sorkar kümtettsü ta temulung lema bilemer," ta Zoramthanga-i ashi. Paisa, "Onoki (MNF) shinga teyari magi sorkar ayong ayonga kümtettsü," ta shisem. Maneni MNF tekolakbai ashiba agi, sorkar kümtettsü atema MNF pur tanga party den longjemtsüsa masütsü. "Sorkar kümtettsü atema

menden 21 nüngdaker. Onoki iba dang nungi menden timba koka 25 mesüra iba dang timba akoktsü imlar. Menden paika ya koktetra ayong ayonga onok majority asütsü ta bilemer," ta pai ashi.

"Party kar den alliance yangluba mesüra coalition ka tenteta sorkar mekümteti onoki sorkar ayong ayonga kümtettsü ta tamang akar," ta Zoramthanga-i ashi.

19-Aizawl Venglai-I YMA Hall polling station nung vote agütsüba sülen Mizoram chief minister yagi iba olen lemsatepa liasü.

Zoramthanga ya taküm state assembly election nung Aizawl East-I constituency nungi toktepar.

Mongolbarnü vote agütsüba mapang EVM junga inyaksangshi masüba ajanga Zoramthanga ya pa indang vote aneben tashi agütsüshia liasü.

Assam sorkari ali atsünga alirtem anin tenzükogo

Guwahati, Yimpoksüi/ November 7 (Agencies): Assam Forest Department-i, Goalpara district kübok Nalbari Reserve Forest nung ozüng alema ali atsünger liya alirtem aninba sentong ka tenzükogo.

Iba sentong ya Goalpara civil aser police administration den longjemer inyak tenzükogo aser ali hectare 100 merektettsü nükjilding lir.

Iba anti-encroachment drive kübok kibong 246 dang parnok lia aliba tesem azüngtettsütsü atema osang agütsüogo aser kibong aika ainshiatokogo. Item tesemtem nung kiojen aser tanga structure tem amenoka lir anungji item ya raksatsütsü atema excavator tem amshia liasü.

Goalpara Divisional Forest Officer (DFO) Tejas

Mariswamy-i ashiba agi, item kibong 246 nem ali azüngtettsütsü atema osang agütsüogo aser parnok aika ainshiatokogo.

"Ketdangsürtem telok asem küma lemsar inyaksangshia arudar. Takoktsü dang süra onoki Mongolbarnü tashi nungbo iba drive tembanga inyaktsü. Onoki Bodhbarnü ya talila anogo ka ama shima yuogo," ta pai ashiba den iba sentong ya Goalpara civil aser police administration den longjemer inyakdar, ta shisem.

Forest ketdangsürtemi ashiba agi, iba tesem nungi mintokertem atema tanga tesem anepalu mesütsütsü, kechiyong parnok ya arem li atsüngertem lir.

Mariswamy-i ashiba agi, permanent structures tem

amenoka aliba tesemtem nungbo item ya bensatsü atema excavators tem amshia liasü.

"Iba sentong tembanga inyakba sülen Nalbari Reserve Forest atsünger alirtem shinga manungtsü inlar," ta pai ashi.

Mezüngbuba anogo Hatimura, Hasdoba aser Angtihara tesem nung inyaksangshiogo aser ani hectare 100 shi azüngtettsütsü.

Assam nung taoba mapanga iba amala mesükba sentong benoka inyakogo. 2021 küm July ita kibong 15 Nalbari Reserve Forest nungi anin aser 2023 küm February ita Sonitpur district kübok Burachapori Wildlife Sanctuary nung ali hectare 2,099 shi merektet aser iba ajanga nisung 12,800 shi dak kongshia liasü.

Manipur nung asendenshir mepetmesü adok; nisung 12 yiru

Imphal, Yimpoksüi/ November 7 (Agencies): Manipur nung Mongolbarnü maneni mepetmesü adokba sülen Manipur police ana aser tzülu nung mapa inyaka aliba tetsür pezü densema nisung 12 tashi yirua liasü.

Injang agi yirurtem rongnung Manipur commando ana aser tetsür pezü ya densema liasü. Mongolbar anepdang 8:30 ako shi nung telungpurtemi Kangpokpi aser Imphal West na arrtsü nung aliba Kangchup tesem nung tenemkolak nungi injang khaloktsüba sülen item nisungtem yirua liasü.

Mongolbarnüsa tanga tatalokba ka nung Imphal West district kübok Kangangband

asertelungpurtemi injang khaloktsüba sülen yimdaklir ana yirua liasü.

Item nisungtem yagisa Imphal East district kübok Maphou Dam aser Ithan Moirangpurel yimtsüng maka liasü.

Item yimtsüngtem nung yimtsüng volunteer ana injang agi yirua liasü.

Osang ajanga ashiba agi, khatpeba ya 8:30 ako nung tenzük aser osang agütsüba mapang tashi nunga khatpeba liasü.

Yirur alirtem ajak Imphal nung RIMS, JNIMS aser Raj Medicity mozüki-i anirogo.

Kasa mapang nung Imphal East district nung Yairipok police

station kübok Thamnepokpi yimtsüng nung alirtem tzülu nung mapa inyaka aliba mapa item nisungtem yagi mintoka liasü.

Osang angazükba sülen Manipur police aser security force tem item tesemtemi ao aser iba sülen telok ana tsüngda khatpeba tenzük liasü, ta police-i ashi.

Item yimtsüngtem nung tensa mejungi lir aser security force talila item yimtsüngtem yagi yokogo.

Manipur nung taküm May 3 nü nungi mepetmesü tenzük aser tang tashi nung nisung 180 dak tema süogo aser nisung 61,000 pei talidak ki toktsür jenshiaogo.

DIPR

PORTRAIT ENTERPRISE
IN ASSOCIATION WITH
DEPARTMENT OF INFORMATION & PUBLIC RELATIONS
AND
DEPARTMENT OF TOURISM, GOVT OF NAGALAND

PRESENTS

HORNBILL INTERNATIONAL PHOTO FEST 2023

THEME: NATURE'S CANVAS - CELEBRATING THE BEAUTY OF NAGALAND

OTHER AWARDS
BEST PORTRAIT 10,000
BEST LANDSCAPE 10,000
BEST WILDLIFE PHOTOGRAPHY (NAGALAND-BASED): 10,000

SEND US YOUR ENTRIES AT
hipfestnagaland@gmail.com

CONTACT US
+91 9436005669
+91 8837262093

FIRST PRIZE: 40,000
SECOND PRIZE: 25,000
THIRD PRIZE: 15,000

26 NOV 2023
ENTRY DEADLINE

SCAN HERE FOR MORE DETAILS

SÜR KÜM KA AJUNGER



ASÜR L. CHUBA PONGEN
08/11/2022

Taküm aliba ajak tanela aser meimchir ajak tangula Pa ket nung lir. Yob 12:10

Asüba ya oadokba masü.
Asüba tetetzü temang shi mali aser ajak nung lir.
Nü tenük amoang aser nai parnok aliba metettsü.
Teti takum lir! Parnok nüden lir.
Nai jembiba oshi melenogo.
Anogo 365 na menungraba ya tashi maitba masü: ibai asenok temeim lemsatepba agi asen mulung sünga aliba sayur.

~ Temeim Kinungtsü, Jabasotem aser Kinungertem.

Rara sülen Israel-i Gaza security ketdang asütsü: Netanyahu

Tel Aviv, Yimpoksiü/Nov. 07 (Agencies): Hamas den raraba temer Gaza indang security ya Israel-i ketdang asütsü, ta Israel Ato Kilonser Benjamin Netanyahu-i ashi.

Rara temer shibai Gaza nung yimsü asütsü ta Hombarnü sensaksem ka nung asüngdang dang, mapang telatet makai Israel-i security khu abentsü amanger, ta Netanyahu-i langzü.

"Asenoki iba security khu mebenra, Hamas kiralongrar tem asenoki meshisadangteti poktettsü," ta Netanyahu-i ABC News den sendaksem dang ashi.

Israel asoshi tembar tajungtiba, United States Tir Joe Biden-i taoba ita Israel dang tashi ajak amshia Gaza amokbangra aibelen tulu asütsü ta tekum dangtsü shir sülen Netanyahu-i iba o ya ashi.

Netanyahu-i Hamas den raraba Biden-i bhukuma nokdaker, saka lenir ana ya tasa balala lir, aser item rongnung civilian tem asü-amaba nungi nokdangtsü merangba aser humanitarian aid agütsütsü asoshi rara anena atatsü nüngdakba densema lir.

Ajisüaka Hamas-i Gaza nung Israel nung pua aliba mechiok tashi ceasefire magizüktsü, ta Netanyahu-i Hombarnüa nenshia ashi saka nüburtem aser teyari agütsütsü atea tera anena atatsü molunga aliba pai ashi.

"Ozü nisung pua aliba

mechioki Gaza nung ceasefire malitsü. Aser mapang tatsütsü anena atatsübo taoba mapanga inyakogo," ta Netanyahu-i ashi.

"Osettsüset, nüburtem asoshi osettsüset aita daksütsü, mesüra ozü nisung pua aliba odaksütsü asoshi onoki tensa asadangtsü. Ajisüaka general ceasefire alitsübo meimlar."

Israel-i Gaza nung bomb pokloktsüba anentsü linük balalai ola adok tenzükogo, koba Hamas-i October 7 nü Israel maka civilian timba sür nisung 1,405 tepsetba tayang kepzüka amaker alitsü.

Hombarnü United Nations Secretary-General Antonio Guterres-i tekeratiba nung ceasefire alitsü ayongzüka liasü aser Gaza ya tila-tanurtem indang leper ama kumogo, ta ashi.

Iba tesem nung teyari agütsütsü asoshi Biden-i Netanyahu dang "humanitarian pauses" nung tashi angatsü

ajungshia liasü saka Israel leniri tesem ajungalen ceasefire alitsü memolungba bhukumer. Gaza nung Jordanian field hospital nung tongtipang medical supplies aser chiyongtsü tem tayimtsü amshia tsükdaksütsü asoshi Jordan den osang agitepogo, ta Hombarnü Israel mitkari ashi. Ita ka junga raradang Haza nung Palestine nung 4,100 densema nisung 10,022 tepsetogo ta Hamas kübok aliba health ministry ajanga ashir. Civilian takum sakaba ya teshasatsü aser tapayutsüka lir ta Netanyahu-i Hombarnü ashi saka nisung asüba züngdangba nungya Palestinian fighter aika dena lir ta ashir. Hamas-i Gaza nung aliba nisungtem ya jong ama amshir ta Israel leniri ashir. "Ibai tsükchir kanga tesashi lir, saka parnok nem mokokdaksütsü," ta pai ashi.

State meyong Global New Light of Myanmar indang front-page sangdong ka ajanga,

Moscow indang Pacific Fleet nungi Russia nung sailor tem honour guard ka Min Aung Hlaing-i salute asüba noksa nung nguogo.

Osang kakat ajanga ashiba agi, Min Aung Hlaing ya antisubmarine destroyer Admiral Tributs-i anir ao, kong Russia indang navy chief Admiral Nikolai Evmenov-i, rong tashi aser weapons systems indang pa dang rasa ashi. Pa nemsä antisubmarine

helicopters indang metetdakja liasü, ta kasa sangdong ajanga metetdaksü.

2021 küm military-i Myanmar sorkar atsüngtokba sülen Myanmar aser Russia na tesendaktep tajungba kumogo. Military-i srokar atsüngba sülen linük nung mepetmesü tulu adoka civilian 4,200 shi tepset aser nisung meyrejang aika pei talidak ki toktsür jenshiaogo.

2022 küm February ita nungi Ukraine amak tenzükba sülen

Moscow-a alima kintemi sentokogo aser parnok ya Myanmar military atema prangbong injang aser tanga hadirtem supply asürtem rongnung tongtiba lir.

Mezüngbuba Myanmar-Russia Maritime Security Exercise (MARUMEX) nung rong aser tayimtsütem densema alitsü, koba November 7 nungi 9 tashi tzüym nung Myeik antiölen 85 nautical miles (157km) pilar agitsü.

(Maneni tapak 8 nung...)

OFFICE OF THE
CHUCHUYIMLANG KAKETSHIR TELONGJEM
CHUCHUYIMLANG TOWN
MOKOKCHUNG, NAGALAND
P.O Chuchuyimlang - 798614

TENÜNGSANG AGÜTSÜR



Chuchuyimlang Kaketshir Telongjem Chuchuyimlang Town ajanga Wb. Kenyangerba aser Wt. Tsüknungkala na jabaso **Sp.Tiakumzuk. Pongen NPSC (CTSE) Engineering Services, 2023** tatidang agiba nung Demonstrator (Electrical Shop) under Higher & Technical Education Dept. nung takok nguteta kaketshir nem konang nüngsang bener arutsüba atema tenüngsang tulu agütsür. Maneni Tsüngremi nü taküm aser wadang tali moajangma.

Sd/-
Sp. Akumsashi
Vice President

Sd/-
Kr. Temsula
General Secretary

Russia aser Myanmar na maritime exercise tenzükogo

Yangon, Yimpoksiü/November 7 (Agencies): Myanmar aser Russia na tang mezüngbuba Myanmar kübok Andaman tzüküm nung joint maritime exercises ka agitsü renemba mapang Myanmar indang military lenir Senior General Min Aung Hlaing-i Russia indang navy chief den ajurutepogo.

helicopters indang metetdakja liasü, ta kasa sangdong ajanga metetdaksü.

2021 küm military-i Myanmar sorkar atsüngtokba sülen Myanmar aser Russia na tesendaktep tajungba kumogo. Military-i srokar atsüngba sülen linük nung mepetmesü tulu adoka civilian 4,200 shi tepset aser nisung meyrejang aika pei talidak ki toktsür jenshiaogo.

2022 küm February ita nungi Ukraine amak tenzükba sülen

Moscow-a alima kintemi sentokogo aser parnok ya Myanmar military atema prangbong injang aser tanga hadirtem supply asürtem rongnung tongtiba lir.

(Maneni tapak 8 nung...)

Mezüngbuba Myanmar-Russia Maritime Security Exercise (MARUMEX) nung rong aser tayimtsütem densema alitsü, koba November 7 nungi 9 tashi tzüym nung Myeik antiölen 85 nautical miles (157km) pilar agitsü.

(Maneni tapak 8 nung...)

Youth Adventure Programme & Rural Sports sentong tembangogo

Dimapur, Yimpoksi/November 7 (TYO): Department of Youth Resources and Sports (YRS)-i sangdong ka ajanga Phek District kubok Shilloi Lake nung ayongzüka agiba mezüngbuba Youth Adventure Programme aser Rural Sports event tembangogo, ta metetdaksü.

Iba sentong ya October 31 nungi November 3 nü tashi agia liasü. Yimda yimtsü nung aliba lanurtem yongtsü nung saisapong aser adventure activities tem ajungkettsü nükjidong nung iba sentong ya ayongzük, koba Innovative Programme 2022-2023 nung shilem ka liasü.

Iba sentong nung district teku nungi lanur 36 den Phek District kubok Phokhungri tesem nungi lanur 80-i shilem agia liasü. Sentong nungsa YRS ketdangsurtem, Nagaland Adventure and Mountaineering Association (NAAME) aser local lenirtemi shilem agia liasü.

Sentong nung shilem agirtem ya süki asüba, zip-lining, rescue and survival operations, hiking, eco-tourism, camping aser anogo ana Rural Sports nung shilem agia liasü.

Sentong nung YRS Director

Kethosituo Sekhose, NCS-i, shilem agirtem pelashishia jaok aser sentongtem ya state nung aliba lanurtem atema koda tongtibang iba indang lemsatepa liasü. Paisa, tesem ka terenlok asoshi tourism-i koda tongtibang shilem agir iba indang lemsatepba den lanurtem nongitetsü atema scheme balala tenzüker aliba indang metetdaksü.

Sentong nungsa Phokhungri Area Sports Organisation (PASO) tir Ashelo-i, YRS-i iba sentong achaayanga katsüba atema kanga pelaba lemsatepba, kong team tem nem jersey aser senpet agütsüba densema lir. Pai, Shilloi Lake tebor ajungba indang ajak den lemsatepsü ajungshia liasü. Iba sentong ya YRS Additional Director Megolhu Dolie lenisüba nung agia liasü.

Kasa mapang nung Innovative Programme kubok mezüngbuba Rural Sports event ya Advisor for New and Renewable Energy, NSDMA GoN Nyusietho Nyuthe-i moaja liasü. Sentong nung o jembiba mapang pai, kaket shisatsü angazüktsü koda tongtibang indang indang lemsatepba den lanurtem dang pei career asoshi

lenmang balala bushidangtsü ajungshia liasü. Paisa, Phokhungri tesem nung alirtem dang iba tesem terenlok asoshi longjemer inyaksü ajungshia liasü.

Asayamung nung mezüngbuba Letsam Team aser Zhipu Sporting Club na asaya liasü. Iba sentong nung YRS ketdangsurtem, yimtsü aser lokti tentet lenirtem aser Town Baptist Church, Phokhungri Pastor nungeri shilem agia liasü.

Phokhungri nung Rural Sports for Football shibangba sentong nung Meluri Additional Deputy Commissioner Albert Ezung alakteta jaoker liasü. Pai, asayamung nung takok angutem nem tenüngsang agütsü aser tarutsü nunga takok tajung nguyonga aotsü atema meranga inyaksü ajungshia liasü. Paisa, iba amala sentong tajung ayongzüka agiba atema YRS dang kanga pelaba lemsatep.

Sempet agütsüba sentong tembangba sülen Letsam Village Baptist Church, Pastor Yinlets?-i tenüngsang agüja sarasadema liasü. Iba sentong nung Indo-Myanmar arrtsü nung aliba Avakhung yimtsü semdangba densema liasü.

Dimapur Inter School Athletic Meet asayaogo

Dimapur, Yimpoksi/November 7 (TYO): Dimapur Inter School Athletic Meet, November 7 nü Government Higher Secondary School Ground, United Colony, Nagaran nung asayaogo. Iba asayamung ya Nagaland Athletics tawabangba kubok Dimapur Athletics aser ANPSA NBSE Unit Dimapur-i ayongzüka liasü.

Asayamung lapokba sentong nung Dimapur, District Sports Officer alakteta jaoker liasü. Lai kaketshirtem dang parnok taküm nung lenla ajak

nung yimya tajung benshitsü, mangdang tulu ayutsü aser meranga inyaksü ajungshi. Laisa, nükjidongji tamakok kwiben ngudir nguaka aremzüka bendanga agüja inyakba ajanga tongteter ta ashi.

Sentong nungsa CEDOK Secretary aser ANPSA Central Vice President, Rev. Fr. Jacob Charalel-i, Inter School Athletic Meet ayongzüka asayatsü asoshi tasü itetba aser bendanga agütsüba atema tenüngsang agütsü. Paisa, iba amala asayamung ya pei ajangzüktsü atema masü

saka asayartem ajak longjema parnok sempet sayatsü aser tajangshiba aser shisatsü angutsü nükjidong nung ayongzükba lir ta ashi.

Rev. Fr. Jacob-i, temeim, medemer yimtepba, nendaka inyakaba amala yimya tajung item amala tetoktepba nungi kaketshirtemi angazüker ta ashi. Maneni pai kaketshirtem dang nükjidong tulu ayutsü aser tamakok angutsü atema tsüba melei risk agitsü ajungshi, kechiyong nükjidong atongtsü atema iba ya kanga tongtibang ta ashi.

WTA Finals: Swiatek-i final asaya nung Pegula kokogo

Yimpoksi/November 7, 2023 (Agencies): Poland tsür Iga Swiatek-i Hombarnü WTA Finals nung Jessica Pegula koka la maneni World number one asayar kümogo.

Final asaya nung Swiatek-i tetenzük nungi Pegula amokbanger asayar aser asaya 6-1, 6-0 agi ayong ayonga minute 59buba nung koka liasü.

Iba asayamung akokba ya Swiatek indang career nung asayamung 17buba akokba liasü aser Grand Slam pezü tashi koker alila ya küm anabuba atonga temaba jenjang nung küm tembangtsü.

"Team koba kü den season tepeyong liasü, onoki tajung tamajung aika ajangshio," ta Swiatek-i ashi.

"Iba ya jangrademtsüka aser



tang inyakba ama dang inyakra onoki ano takok aika ngutetsü," ta Swiatek-i ashi, shiba asayamung tepeyong nung game 20 nung dang tamakok ngua liasü, koba otsü tasen ka lir.

Arishi küm 22 tain Swiatek-

i, world number one asayar Aryna Sabalenka semi-finals nung tsükdakja liasü. September ita US Open sülen Sabalenka-i Swiatek ajateta No 1 asayar aküm saka la tang tanabuba jenjangi aluogo.

Pegula aser Swiatek na tesüsa August ita Montreal nung asaya koba Pegula-i koka liasü aser lai iba asayamung nunga asayamung tepeyong kanga junga asaya aruogo.

Asaya nung Poland tsür la yagi service kanga junga oa asaya amokbangba den Pegula court ajunga nung asemzüdakja liasü.

Pegula-i final nung junga masayatet aser la indang serve ponguben tashi break südaksü aser unforced error 23 tashi mena liasü.

Peren Dist. Legislator football asayamung Nov 9 nü asayatsü

Dimapur, Yimpoksi/November 7 (TYO): 13buba Peren District Legislators Football Trophy 2023 November 9 nü Peren Town Public ground

nung 10:30 ako nung tenzüksü. Asayamung lapokba sentong nung Deputy Chief Minister Nagaland T.R. Zeliang alakteta jaoker asütsü.

Naga flag aser constitution alema... (Tapak 1 nungi...)

Naga nung yimten ken o ya 1997 nungi jembite nung aser noklangben dak tema jembishinür alitsü südi, saka telemtetba kecha mali aser ibaji ajanga Naga nung jashir, ta pai ashi.

Naga nungeri joko iba khuret mebeneteter, ta ashi.

Prangbong amshiba yimya aliba mechi nung yimtsü madokteter, saka parnoki yakta temai adoktsü.

Flag aser constitution akhangba ya yutsütsüla ta nai angateter asü, ta asüngdang dang, 'flag aser constitution akhangba ama sorkari magütsütsü ta Union Home Minister Amit Shah-i yimjak nung jangja-jangja shiogo, aser State Assembly nunga metetdaksüogo, anungji Naga nungeri danga lenmang bushitsüla,' ta pai langzü.

Flag aser constitution dak alaka danga kishi lapoka lir ta Shah-i aiben sangdonga lir, aser pai jembiba süki ia agizüktsüla, ta Imchen-i ashi.

"Jembishinü yimya meshidak. Danga lenmangtem lapoka ayutsüla. Solution tekeratiba nung alibaji tajungba ta nung nung tangatetba tejangja lir," ta pai ashi.

Naga Political Issue ya AZ Phizo lenisüba kubok 1951

Plebiscite nung ajemdaker Naga nung arok agenda lir, koba GoI-ia meteta lir, ta ashi.

Nagaland Legislative Assembly nung MLA 60 densema Naga nung ya shidakba stakeholders lir aser yangji sorkar tenzüker aser Naga nung nung nung dena lir aser Chief Minister balala kubok NLA nunga pangzüng balala agizüka lir, ta pai ashi.

Ibaji jurila meyong masü, saka Naga nung indang lir. Naga nungeri bendanga agütsüba tang tashi Naga nung molungjang nung lir.

Külem tenzüker, Ministers, Legislators aser dangar temi sentong balala nung jenjang balala nung Naga Political Issue indang jembia arur aser ni kü tangatetba lemsatepba nung tai mali ta bilemer, ta Imchen-i ashi.

Naga nung tashi temeteter aser nung nung media sapang balala nung parnok tebilemba lemsatepa arur.

State Assembly nung züngsem 60 aliba nungi nia ka lir, anungji Naga Political Issue nungya nia stakeholder ka lir, aser parnoka (MLA) nung nung shim asünung nung nung aginüba ama jembir, ta ashi.

October 23 nü sangdongba nung ni ajang-ajanga nokdaka lir, ta Imchen-isa ashi.

Bihar nung nütsüng... (Tapak 3 nungi...)

Bihar nung nütsüng shilem 29.61 bo sen 10,000 mesüra iba dang nungi tajemba agi alir, nütsüng shilem 28-i dang sen 10,000 nungi 50,000 tsüngda aazüker aser ita shia sen 50,000 dak tema aazüker nütsüng shilem 4 dang lir.

State nung nütsüng shilem 64 shi kanga timtema alir aser ita shia income 10,000 mesüra iba dang nungjagi tajemba angur, ta iba survey ajanga bushitet.

State nung Scheduled Castes nisungtem shilem 6-i dang Class 11-12 tashi azüng aser state nung class 11-12 tashi azüngtem-a shilem 9 dang lir.

Mongolbar nikongdang Bihar assembly senden nung Scheduled Castes, Scheduled Tribes, Backward Classes aser Extremely Backward Class densema telok telemsa 215 indang rongsenkettzüng jenjang osang tejangja metetdaksü.

Russia aser Myanmar... (Tapak 7 nungi...)

Iba drill ya anüng, tzüyim aser tzü telong ajanga lendong bener arutsüba nokdangtsü aser maritime security measures dak ajemdaker agitsü, ta Myanmar state medaia sangdong ajanga metetdaksü.

Russian state news agency TASS-i ashiba agi, iba exercise nung shilem agia aliba rongtem rongnung antisubmarine rong Admiral Panteleyev-a densema lir.

Min Aung Hlaing, shiba lenisüba nung military indang State Administration Council inyaksangshir, pai sorkar atsüngba sülen 2022 küm September ita Moscow aser Vladivostok semdanga Russia tir Vladimir Putin den sensaksemogo.

Russia nung ketdangsur ya Myanmar indang Armed Forces Day nung alakteta jaoker liasü, koba küm shia March ita agir.

BILEMDANGANG

"Tangar o agi na tanishidaksü."